
ОЗОД ВА ТИНЧ ЭЛНИНГ БОЛАЛАРИ

Халқаро болаларни ҳимоя қилиш кунига бағишлаб ўтказилган байрам тадбирларида бахтиёр болалик нашидасини сурдилар

Аввал хабар қилганимиздек, жорий йилнинг 22-31 май кунлари вилоятимиз бўйлаб “Бахтли болалик” лойиҳаси амалга оширилиб, унинг доирасида ўндан ортиқ кўрик-танлов, мусобақа ва кўргазмалар, учрашув ва акцияларни ўз ичига маънавий-маърифий, кўнгилочар тадбирлар ўтказилди.

1 июнь – Халқаро болаларни ҳимоя қилиш куни Фарғона шаҳридаги Аҳмад Фарғоний номидаги истироҳат боғида “Бахтли болалик” лойиҳасининг якунига бағишланган тантанали тадбир ташкил этилди. Унда жам бўлган ўғил-қизлар, ота-оналар, бобо-ю бувилар озод ва тинч элнинг миллат давомчиларига қаратган меҳри ва ғамхўрлиги намуналарига гувоҳ бўлдилар.

Истироҳат боғининг майдончаларида “Мафтункор ранглар олами” расмлар танлови, “Зукко китобхон” акцияси, шахмат-шашка, стол тенниси ва кураш мусобақалари қизғин руҳда ўтди. Энг намунали умумтаълим мактаблари, мактабгача таълим муассасалари, “Баркамол авлод” болалар ижодиёти марказларининг тасвирий ва амалий санъат, миллий ўйинчоқлар ва халқ ҳунармандчилиги кўргазмалари, “Дунё болалар нигоҳида” мавзусидаги фотосуратлар намоиши, энг яхши бадий китоблар савдоси байрам иштирокчилари эътиборини жалб этди.

– Мен ҳозиргина чизган суратимни “Ўзбекистон – бахтли болалар мамлакати” деб номладим, – дейди Фарғона туманидаги 37-умумтаълим мактабининг 6-синф ўқувчиси Назокатхон Қосимова. – Дунёда мамлакатлар кўп, болалар ҳам сон-саноксиз. Бироқ Ўзбекистон – яқка-ю ягона. Биз эса унинг бахтиёр фарзандларимиз.

Масканнинг ёзги амфитеатрида “Бахтли болалик” лойиҳаси доирасида ўтказилган барча кўрик-танловларнинг ғолиб ва совриндорлари, фаол иштирокчиларини тақдирлаш маросими бўлиб ўтди. Унда Рўздатжон Маллабоев, Мафтунахон Холмуҳаммедова, Дилфуза Набижоновна, Рухшона Хатамжоновна, Абдурахмон Аминов, Гулсанам Мираҳмедова сингари 30 дан ортиқ иқтидорли ўқувчилар, шунингдек, Бувайда туманининг “Маоний”, Фарғона шаҳрининг “Адолат”, Ўзбекистон туманининг “Зукколар” ёш китобхон жамоаларига “Фахрий ёрлиқ”, китоблар жамланмаси ва спорт анжомлари тантанали равишда топширилди.

Байрам лойиҳаларида фаол иштирок этган болажонлар “Камолот” ёшлар ижтимоий ҳаракати вилоят Кенгашининг махсус йўлланмаси билан шаҳар марказидаги “Болажон” ва “Пингвин” кафеларида бепул музқаймоқлар билан сийландилар, уларга барча аттракцион ва ўйин майдонларида имтиёзли хизматлар кўрсатилди.

Умидимиз юлдузлари шарафига ташкил этилган концерт дастурида вилоятимизда фаолият кўрсатадиган болалар мусиқа ва санъат мактаблари, маданий марказлар, мусиқий даста ва тўгаракларнинг энг иқтидорли ўғил-қизлари иштирок этишди. Улар ижросида болаликнинг беғубор куй-қўшиқлари, ўйноқи рақслари намоиш қилинди.

Шу куни ўз хизмат бурчини ўташ чоғида ҳалок бўлган ҳарбийлар, кам таъминланган oilаларга ташриф буюрилиб, уларнинг фарзандларига вилоят ҳокимлигининг велосипед ва спорт анжомлари тўхфа қилинди.

2017-06-05 15:29:55